

suum iubar Cometes explicuit, quo his de rebus ante, quàm euenirent, mortales admonerentur. Proxime superioribus annis multa in Zelandia & Hollandia ab Oceano oppida absorpta sunt (nam hæc quoque cometis accepta referunt) Ferraria, nobilissima urbs, fere ab imis conuulsa sedibus, & terræ labefactata motibus, pene tota cum magnificis et sumptuosis illis Diuorum templis, ac publicis alijs priuatisq; ædificijs corruit, & deformata est, nec tamen ullum tantorum monitorem malorum cometen vidimus. Sed huius generis mala pene innumerabilia ex ueteri & nostrorum temporum historia, in medium afferre, nullius prope negocij fuerit. Illinc summat licet, si quis magno eorum studio tenetur: Nobis hæc satis sint, quæ uel uidimus ipsi, uel uidere potuimus.

Verum longius ab eo, quàm initio constitueram, dū ostendere conor, si exemplis pugnandum sit, numero nos, & multorum insignium euentuum copia facile uincere. Quanquam nullum prorsus exemplum illorū seruire instituto potest. Nam si propterea talia, quæ commemorauimus, mala, ad cometen, tanquam ad causam suam referri oporteat, quod in illud aliquando tempus incidant, quo cometes aliquis ardet, aut postquam deflagrauit, consequantur: uidendum est illis etiam atque etiam, ne ad multas atq; eas quidem perabsurdas consecutiones fenestram aperiant. Nam, ut alia omittā, efficitur sanè hoc modo, ut eius, quod fit, aut paulo post sequitur, causam esse dicamus id, quod uel præsens est, uel non ita pridem antecessit. Sic ortum, sic obitum Solis, sic fulgura, sic tonitrua, sic paelia, sic iridem, sic multa alia earum causam rerum omnium faciemus, quæ his interuallis ab hominibus suscipiuntur, & fiunt, atq; adeo quæ eis præter expectationem, aut uoluntatē accidunt. Febre aliquis corripitur, aut morbo alio, moritur etiam: alius ex alto cadit, aut ceruicem ex equo delapsus frangit, dum tonat, aut fulgurat, num propterea aut tonitru, aut fulgur, febris, aut eorum quæ diximus,

ma